

樂志堂文集

樂志堂文集卷十五

南海 譚 瑩玉生撰

約同人重結浮邱吟社啟

維粵人夙喜稱詩迄明代羣思結社孫典籍則南園啟  
秀陳宗伯則東皋繼聲訶子林中巾瓶並參淨契芝蘭  
湖畔簪裾彌豔香名以迄沈奇玉之越嶠吐華汪白岸  
則汾江摘藻殆難更僕時有替人浮邱寺者山海滄桑  
仙靈窟宅撒金巷古倘舄跡之猶存拾翠洲連尙驚痕  
之宛在昔原丹室遞建靈祠今屬祇園窅然香界彌年  
浩劫誰移蘼蔔之花上已佳辰猶采蒹葭之草證投龍

之舊說胥并荒涼記攜鶴之曾來騷壇閨寂溯自蔣穎  
叔軒題挹袖趙蘭溪亭署吹笙文采風流後先輝映朱  
明館闢大雅堂開稱仄北郭之聯吟愜西園之雅集則  
有郭篤周王唯吾之提唱黎瑤石區海目之詩歌社事  
鼎興詩名益著捧敦槃於斯土實開廊屈之先張旗鼓  
於中原屑逐李王而後著作自煉同丹竈而永留靈光  
歸然與玉山而並峙迄今舸船一例問陳崇義而難知  
并肆駢羅業方孚若所曾咏盟白鷗而獨往滄波渺然  
咏黃蝶之雙飛芳草如積剛值某上人重裝寶刹特葺  
精廬殿閣莊嚴院宇明瑟一龕燈火時開選畫之場初

地香花仍闕聽琴之所某等佞佛無心逃禪有願或半  
生未到或卅載重經話煨芋之因緣間種桃之閱歷竭  
來城市宛到山林寄託文章合呈仙佛竊擬傳賤遞約  
載酒頻過緬遺蹟之依稀嘆餘風之泯滅冀神交之可  
託期詩教之再興詣竹院以分題拓蕉牕而檢韻座兼  
蘿袞先嚴選客之條局判鶯花易醒游仙之夢旣流鶯  
之欲語何必比鄰似舊燕之重來翩然入社嗟嗟偏隅  
畧靖狡寇初平東南之戎幕猶張中外之軍儲孰辨陳  
無已之索句容易閉門杜子美之工吟綦難卜宅蓬萊  
可到成大藥於何年句漏爭求覓丹砂而無地中年哀

年年健在各各蕭閒會訂茶瓜飲耽文字悟圓通於老  
佛仿游戲於飛仙無妨抱膝之吟有分等身之著元帥  
合開壇坫此原文獻之故鄉遺民但咏田園迥異清翁  
之吟社狂歌驚座女珊瑚當獻自海神名作擅場黃牡  
丹定賦同忠愍繫前後五子十六人果足抗衡浮邱舊社共十  
六人見粵臺徵雅錄獨宋明兩朝五千年當與上下謹啟

擬庾度支謝東宮賜宅啟

某甕牖繩樞之子窮閭漏屋之儒倚木覆苫編茅織楚  
豈望府南卜宅於以永年山北構園署之離垢况乃精  
廬冠絕瑞室巋然館宇清華庭階敞麗匪羅含之相感  
蘭菊叢生豈徐勉之所營桐竹交蔭華樓臨眺殊富芟  
蓮迴榭娛游復繁花藥學慙高密竟開通德之門才異  
毫邱乃獲慎終之室輔慙園綺數越陳劉置醴非榮報  
書宜亟

擬庾度支謝湘東王賚米啟

俸餘供鶴候變鳴蟬色異紅蓮種殊烏節道安誰餉殷  
勤千斛之貽公瑾未求慷慨一困之捐成非擲地瀉似  
量珠聚可爲山炊奚用劍方朔不飽欲給夫侏儒脩齡  
苦飢待索之仁祖活枯魚之孔易掘蟄燕以無煩鼓腹  
酣歌折腰謹謝

擬庾度支謝武陵王賁絹啟

某啟比元忠之賞重未貢蒲桃似叔平之盈足豈裁橘  
柚冰紈照雪霧縠含霜足餘手口之須誰爲身名之託  
王丹機杼亦抵陳遵任昉衫裙復須沈約才非費昶製  
曲未諳佞豈阮佃夫書宜亟



擬庾度支謝陶隱居齋尤煎啟

某游非許邁處異劉虬未到潛山罕逢涓子猥蒙錫以  
香膏餉之丹劑朝烟夜火備窮淋瀝之方玉液金漿特  
見華腴之妙使山林之隱逸五岳齊肩比洞府之神仙  
百年元鬢碧桃流水或夢瑤臺用明邵寶詩甘菊寒泉無煩  
酈縣精靈耐久俟鈔紫微之書服餌守閒任墮萊蕪之  
醅

謝齡友山都轉惠銀啟

夙承弊借命擬作而難工忝荷恩私惠精鏐於極困恭  
惟友山先生都轉大人和羹政裕借箸心勞伫銅柱之  
銘勲禁珠池而比潔卑職廣文飯缺司業錢空忽荷寵  
頒實深欣忭聞戒偏同在薛餽比兼金賣文竊愧推袁  
供虔一瓣頓增聲價遙頌平安謹謝

爲孝兒聘梁氏新婦啟

竊以鴛鴦社結方期躍馬金臺鳩鵲橋通遠覩乘鸞碧  
漢八千里外奚虞作合之難二十年前轉憶論姻之舊  
恭惟朗翁親家大人門下荀氏慈明賈家偉節劉孝綽  
之詞藻後進所宗任彥升之文章當今無輩張士簡定  
爲宰相物望名家崔孝伯當作司空高才大量某學劍  
未成負書安往買田陽羨可學端明卜宅柴桑能如元  
亮車裘同學宛然老杜平居臺省諸公誰念鄭虔官冷  
矧以令姪女蘭儀蕙問菊豔茗華職原勤於攝桑才更  
工於賦茗小兒原慙公望本有童心問菽麥其誰分課

櫺梨而亦嬾固謂屏間孔雀命中綦難廢下麒麟同嘲  
匪偶而乃四聲未知燈樹一言便作鏡臺是田父宜繫  
烏羊與將軍俱爲黃鵠亦以少年契分交到忘形當由  
夙世姻緣婚同指腹昔遠辭乎嶺嶠今乍返於都門幸  
踐舊盟俾完佳對所愧果槃花粉豹采熊祥未遑待足  
而行冀誦及時之詠任勞作法業崔悽之笑人原匪平  
婚願庾家之顧我仍望夙嫺篇什不薄王郎特丐品題  
宛同姚合嘉禾齊福朱輦同心如陳實之兒孫比劉綱  
之夫婦鴻案相莊於邇日鹿車同挽於他時無任燕私  
不勝雀躍

顯微鏡贊

有序

夫大海水入於毛孔則毛孔實作海觀恒河沙擲自掌  
中則掌中業與河等合成寶蓋悉轉法輪其諸涅槃之  
蘊乎然而止水爲淵本列子之成說太山爲小亦莊周  
之寓言以至蟲臂鼠肝蝨股蟬翼蟣蝨貫心而不絕蜻  
蛉拂翅而仍生豈勦說之誠然抑曩篇之闡合迫觀於  
西洋顯微鏡乃不禁喟然矣顯微鏡質本玻璃用殊鑿  
鑿製從蠻島販向麟洲金薄銀華白旃元錫筭仍琥珀  
佩謝繩穿架有珊瑚支同鼎立卽而視之煙霞詭狀川  
陸殊觀么麼幾若俊雄眖麗輒同悅陋杵梨與橘柚無

別寸草共叢蘭不殊魚服龍形牛毛麟角狸變則豹龜  
長於蛇仍短綆而汲深匪積羽而折軸明皆象罔可得  
元珠善豈庖丁居然游刃其鑒之以至微也或蠕動蛭  
飛或雨生陽死脈望如人髮之小嬰蜺藏鹿耳之中集  
蚊睫而弗驚處蝸角而仍鬥離朱之目毫已察而何加  
老子之言穰轉迷而必誠縱謂名傳大眼定若車輪依  
然賦擬小言悉經鍼孔而迫其顯也互勘猶是諦觀悉  
非神光在離合之間消息但轉移之際若埴之在埏也  
恣陶之所爲猶金之在爐也任冶之所鑄本來面目苦  
爲分明別有肺腸奈真空洞問陰陽所亨毒索稟賦於

幽冥爲鵲爲烏非驢非馬大加數倍殆非純任自然中  
隔一層相去能令以寸夫金弧玉弦曾無激矢之用翠  
綸桂餌實非垂竿所資鏡需明已亦藉鑒人見心膽於  
秦宮正衣冠於唐殿鄒忌之知唯自照秦嘉之與亦安  
施外此豔說盤螭矜言見鹿致風雷而已幻厭妖魅而  
能靈祥似珍之兆三公而可必賢如蒙正見百里而仍  
辭尼斯國之王孫可傳奕世陸安州之漁父空識前生  
茲鏡來經蕃舶夙有鬼工竭彼巧思創茲奇器斷棘猴  
而竟就削木鵲而能飛又安事芥子須彌棗葉閻浮之  
說者乎而不知形上謂道形下謂器莫崇於累土而九

重之臺次之莫深於平地而九仞之井因之俗雖判乎  
華戎語實兼乎釋道其卽吾儒莫顯乎微之旨也乎僕  
勲業頻看行資或賴覆卮誰敢百年端藉以寫書典衣  
不妨廿卷會看其補集爰作贊曰

孰攜巨鑑遠涉重溟將迎有道造化無靈肖翹異象炊  
累殊形安花誰對刻楮宜精色相本空流行所定鑒豈  
常儀來仍順應或隘天心彌知物性忽昧生平遑言宜  
稱蠶蠋能化敢笑奔蜂禿鷲始大未若桃蟲毫芒山邱  
天地稊米智等挈瓶事同測蠡不減而增相懸亦肖自  
可了知甯非顯照循環生滅倚伏存亡元機對待至理



端詳妙超繩墨教溢梯航夫微之顯盡語空王

欽賢堂頌

有序

昔令尹恤民無一日之積平仲相君卻千金之奉豈甘  
爲糞陋習於拘苦哉公廉則絕私清儉則寡欲政平而  
訟理循吏之道必階於此焉然而茹蘖飲冰恒望古而  
遙集累金積鏹尙於今而爲烈嗚呼十賢遐哉弗可企  
已嶺南飯稻羹魚紵衣絺服包帶山海珍阜日至城門  
一過便得三千番舶之來歲甯四五家儲寶鏤之飾邑  
富璫珥之珍素是妄庸肆其貪墨然而火耕水耨非無  
凍餒之人兼巷并疆實沿淫侈之俗惕武溪之明訓酌  
華夫之危論爾俸爾祿不田不商珠海金山其足付充

車聯駟者哉彼有貧如債帥陋等市曹既求粟以徵魚  
且賣樵而鬻水資乃須夫芒屨餉至給以檀車溷軒復  
何奇巧羊元羣竟載以歸沙門豈稱求須王僧達且劫  
以取別先五匹之絹謂得三升之錢允爲公論所不容  
或且厚亡而難悔別有孫盛高名頗營貲貨石崇才氣  
乃無行簡王紘和直之性終以好斂貽譏隗仁威惠之  
稱未必愛財非失文雖奇麗豈容自以爲功政愧潔清  
敢信義然後取果捫心其自問已汗顏之實甚耳欲全  
拔萃之業遂隆思古之情欽賢堂者元祐中廣州刺史  
張頴所建以祀前代賢牧滕脩吳隱之王絳宋璟盧奐

李尙隱李勉孔致虛鈞蕭倣等十人者也霜情并茂冰  
宇彌高從猿辭隆清剋潔慙削心約志素德嚴規洵足  
以提名抗迹激貪懲競者焉歲月剝復風霜凋零羽葆  
雲飛璇題燼滅游九京者但流連於隨會過大梁者徒  
伫想於夷門暇日不揣謫陋輒爲之頌亦庶洗鏡貪氓  
澄革汙吏爾遠愧子瞻之文復慙穎叔之贊不同臨漳  
小吏頌裴鑒清德實冀襄州刺史瞻楊震畫像焉其辭  
曰

嶺海沃饒珠服玉饌孰竟辭金誰還問絹南貨空嚼越  
裴競炫觥觥張侯作督廣州敢渝晚節或媿前脩乃構

斯堂厲彼貪流梅檀一瓣蘭茝千秋顯先出守夙代熊  
睦節鉞仍舊編素非辱鼓吹特加梯航自肅仙人載止  
手持嘉穀粒我烝民功歸良牧處默絜素儉石不羸啜  
菽表節挹泉厲精心存革弊志慎標名剔魚并黜鬻犬  
誰營擁絮行館投香歸舫方慶治廣遠聞美化前帥何  
昏府僚何詐交往悉絕秋毫不假部民獲安市舶亦詫  
賚有綵錦績誰方駕廣平遺愛亦有豐碑教之陶甓代  
厥茅茨大忠能扞美利克貽諂諛誰樂貴幸甯私許停  
有詔驛迂何辭虛公矯矯寶仍山積貪吏拱手中使懼  
魄論參四賢誰歟沓墨尙書公忠爲法左遷賜綵以慰

懷金莫憐所性已定無知亦蠲以方前哲差無媿焉三  
爲憲官摭擊所先王孫貞簡摧姦抉隱勇足靖亂潔能  
懷遠招討敢緩檢閱誰忍服器不營犀珮悉盡耆老去  
思朝廷獨允巢父公正爲帝所詢州逋旣釋吏俸惟均  
律嚴下戶澤普流民來甯薄賦沒更推恩窮兵峒蠻作  
俑何人子私仁恕敢沿陋習干預有人捆握誰納遷謫  
伶俜華獠錯雜流亡所依婚嫁以戢邊徼肅清崇祠爰  
立思道公廉勁氣直攄敢求珍賄月俸之餘槁梅誰取  
穀帑曾儲別調鼎藥漫寫輟書同列所忌鬱伊海隅耿  
耿十賢維民之表心迹俱清平生何矯居不取豐去甯

儲小冰壺玉尺雲馬颺車建豎則異身名豈殊粵山峩  
峩粵江滔滔池平樹古視此堂高

嘉禾頌

有序

維道光二十有九年春二月英夷議進粵城謂踐舊盟  
冀如夙約我制府仲升徐公中丞崑臣葉公謀先震疊  
道本懷柔不煩立碣以分蠻酋弭伏共嘆轉圜之妙闔  
境謳歛海晏山明人和歲稔迨夏五月芳穎旣擢嘉禾  
遂生始自近郊迄於鄰縣覩祥花之濯露協穗殊莖羨  
香稼之搖風一稔二米夫詩歌后稷書紀元公丹雀銜  
於炎帝之時白鸞翔於燕昭之世黃龍縣改神爵郡同  
贊有鄭元謳惟曹植權德輿之所表韓退之之所陳類  
皆歸美宮庭薦馨郊廟我朝不矜瑞應之圖誰進徵



祥之說真如往牒奚敢上聞至謂魯恭拜中牟縣令實  
產庭間謝承遷吳郡督郵乃生部屬郭汾陽之在甯朔  
經宿復生梁彥光之刺岐州乍形連理又若後漢書南  
蠻傳云板楯數反蜀郡趙溫恩信降服於是宕渠出九  
穗之禾尤其明驗者矣乃兩公且聞之而若驚並卻焉  
而勿受然而碑刊德政嶺海所同心也頌獻中和儒生  
之本業也此日亭名喜雨神功均讓之太空他時閣上  
凌煙軼事並垂之不朽當與雁門太守 殊恩進北地  
榮封定偕羊石仙人妙繪擅南州佳話乃作頌曰  
觥觥兩公綏安南服稻本三時禾原九熟載觀新苗迭

生嘉穀厚載休徵太和同福邊言奏賦詎願名書災祥  
待誌職貢先圖豐穰足慶頌禱非諛九重恩渥五穗  
靈符

賴園橘頌

有序

僕

以咸豐壬子司訓石龍土宜橘紅州解稱最衙齋所  
生亦足媲美於園令學博之俸宜兼署乎橘官乃以蕪穢  
弗治收成轉歉則有楚頌亭主人賴君者業治生以灌  
園樂傾蓋爲知己以比鄰之冷宦作村田之寓公恰逢  
啖荔之期畧遂看花之願則見香團野露色炫江星素  
裏離離朱纈的一枚比葉謝井水以療人十載連陰  
屆園霜而饋歲陽羨三百本坡老親栽武陵一千株李  
衡足用且也麟毫表異鳳尾叶祥知名共說伯休奏效  
殆如蘇澤夫李白聲價固藉韓荊州之品題

園有阮文達師撰記

而褒城蕪殘彌增孫可之之感喟知培植之有自幸遭  
逢之可娛貨殖傳成獨說渭川之竹神仙樂在僅餌商  
山之芝乃作頌曰

豈惟南交獻稱瑞橘靈藥所需瑰異特出亭猶楚客園  
比蘇仙侯封千戶樹種百年謝傳文傳庾郎寓久敢喚  
木奴便呼橘叟辣同薑桂珍倍薇苓園林之寶益壽延  
齡

鎮海樓銘有序

夫脈分大庾夙推門戶之雄氣望靈洲獨紀衣冠之盛  
盤紆直溯夫五嶺割據豔說乎兩家興衰果卜之地形  
補救實資乎人力秦時王氣且鑿馬鞍之岡蠻島妖氛  
待移鑿鏡之市寶藏則猶存赤石萬鑑金虛

見南海古蹟記仙

靈則永駐白雲九還丹冷虎頭門遠雁翅城高宜築望  
樓合名鎮海斯樓也高至廿丈巍然五重越井岡之巔  
武王臺之上前明朱永嘉所創造我朝撫軍李毅可  
所重修歌舞荒涼劫換紅棉之寺扶胥浩渺勢吞黃木  
之灣控黔楚兮毗連摩星嶺駐對羅浮兮離合見日臺

平三城陡開雙闕屹立陸賈亭在盧循廩存錦繖猶張  
銅柱未拆西北兩江之所縈繞東南一尉之所撫綏八  
寨崎嶇犄人之所棲託七洲泐泐蕃舶之所往來莫不  
粲若列眉明如視掌且也丹楹霞豔碧牕霧寒層檐高  
舉飛棟交竦鞏固闔乎今昔瑰麗稱其山川洵百粵之  
鉅觀而一方之勝概者哉說者謂尉佗倔强於前劉龔  
跋扈於後騁餘威若豺虎足抗中原肆大戮於鯨鯢業  
更數主惟雜霸之氣在使偏安之局成岫衍巖層山重  
水複特資鎮壓爰底隆平數百年漁讓耕推邇安遠肅  
黃蕭養猶然劇賊尙之信轉美降王迭逞干戈終櫻斧

鎮其他么麼僭竊亦旋即誅夷未獲一民曾無寸土則  
斯樓之築端匪偶然夫厥効之符豈簪裾所屑道形勝  
之說亦閭巷所習聞然粵自夷氛不靖兵氣旋消或藉  
地靈豈關將畧僕登同王粲目異長康睠念鄉邦言思  
疇曩亦名望海見新語須白太傅之詩歌冀似籌邊頌李  
贊皇之勲業乃爲銘曰

粵秀高標是曰王山近撫三城遠控百蠻峩峩遺構伊  
誰選勝山峙若屏海環如鏡由來閩位雄長此邦漢惟  
趙尉宋有劉郎作鎮以樓全銷霸氣蜃結宛然龍蟠欲  
避林巒猶昔川陸何如梯航玉帛帶礪車書黃鶴岳陽

殆非其匹更錫樓名寰中第一

五仙觀鐘樓  
名嶺南第一



花阡銘

有序

自昔纏綿忠孝類有閒情磊落英雄偏多韻事禹峽山  
飛來寺側花溪第五灣瑤臺之下有花阡焉明朱叔子  
葬落花處也叔子生當明季死悼國殤縱歸先軫之元  
安問王罷之冢而乃鬱鬱佳城早結鉛華之局蕭蕭荒  
塋特留香火之緣屢如永訣而淒然當夢香魂之肅拜  
不愧朱家之游俠鏤骨于春合封香國之賢王埋齒一  
例香銷粉褪頻下玉棺紫爛紅稠同皈寶刹誰登鬼錄  
優曇待轉法輪更譜神弦清淨足開詩境寸碧復營丙  
舍萬紅如有後人洵吾輩之熱腸亦雅人之深致顧或

者謂茫茫六合盡零金賸粉之場各各羣芳同瘞玉埋  
香之所比佳人之葬骨稱仄詞客之招魂鴛鴦蝴蝶之  
篇足稱才子芍藥薔薇之語原近女郎不知正則行吟  
多言香草廣平作賦遞擬梅花小杜談兵偶託興於鬢  
絲禪榻坡公謫宦獨愴懷於歌扇舞衫雨晦風瀟珠傷  
翠死傷心遂古懷抱可知灑淚彌天空闊無際尙憶回  
風之舞猶存到地之香步兵一時懸尺涕於鄰婦昆明  
萬里問劫灰於東方百感中來萬端交集海枯石爛地  
老天荒眞性瀰漫壯懷徘徊比之收楊妃之錦襪蔓草  
平原拾蘇小之金釧紫蘭香徑愈覺其可悲已僕考古

熟聞尋春偶到淚如帝子染苦竹以爛斑歌豈虞兮作  
閒花而搖動靈旗縹緲往來經蔬葉之湖斷碣淪亡頑  
豔勝桃花之廟萇宏血碧如接英風世傑頭香同殉毅  
魄晚霞如繡新月當眉不同劉氏素馨之斜直儷明妃  
青草之冢益巖花禁兼祭鬼雄如詣南園薦菊酌三忠  
之廟匪游北郭折梅弔百花之墳乃作銘曰  
殘膏賸馥姹紫嫣紅香凋南國怨入東風浹歲芳華何  
人眷屬禮勝國之忠魂登茲邱而痛哭

端溪石研銘

毅魄星精奇姿月狀鳳集山中螭盤水上壽世永貽結  
鄰誰訪文字祥符玉堂新樣

又

爭傳巧製晚出良材雲微覆處水記呵來紫金標格蒼  
玉胚胎能兼四絕或免三災

又

星斗涵光烟霞捲翠天地英靈古今文字烏府鋒稜玉  
堂符瑞

又

樂元堂文集卷之三  
牙音鑑面穀理瓜膚南國風雅西洞琳腴締交德人終  
身與俱

又研銘贈徐鐵孫大令

毫損非材墨磨能污萬里牋繒一家詞賦結鄰可念壽  
世同傳尙書鐵面晚節猶然

天青研銘

知己之知德人之德態變風雲緣留翰墨作太沖賦見  
平原文何曾亂著又可徒焚

青花研銘

秋水分明春風局面從事能離故人如見丹青顏色花

草精神三灾倖免一瓣彌珍

羽林祥研銘

投筆安之挽弓奚似文字惓惓吉祥止止堂廉或用台  
輔誰徵交論金石瑞叶家庭

澄泥研銘

緇縫得細金試徵堅洮河未似鄴瓦同傳秋光無際古  
色蒼然人原絳縣宜許永年

又

仿昔殿材傳今研譜潤比春波霽經秋雨造物才奇良  
工心苦幸獲瓦全永貽千古

欽旌雙節陳母關太孺人葉太孺人七十壽辭

序

維旂蒙協洽之歲我礪甫茂才生母關太孺人春山上  
舍生母葉太孺人壽踰七袞大府請於 朝詔旌雙節  
已三年矣竊謂懷清巴婦行義桓嫠操凜冰霜義原匹  
敵卽謂士行有母實使知名絡秀生兒相將舉酒亦未  
必絳桃竝藥偏禁特地之寒寸草畱暉永駐長春之景  
枚皋本孳子各詔能文崔氏有貴賓敢令進炙織蒲如  
故交推掇斛之恩連璧堪誇益勵折蓼之教遍求往籍  
殆罕其倫維兩太孺人蘭儀蕙問菊豔茗華買必眞珠

歌刪團扇汝南旣嫁系非出於小家節度何來緣倘論  
於夙世我桂亭詞丈溪山久駐不煩駿馬戎裝筆墨誰  
司亦有畫簾椽燭子敬臨渡來互送迎魏公暮年畱偏  
簡靜縱燕巢之早構反麟紱之先徵厚薄不嫌心形俱  
服矣無何而鏡匣光埋琴弦響寂身輕學絮原可升沈  
命薄如花猶然婉麗鳳凰棲而可卜鸚鵡去而誰尋各  
以故主恩情孤兒身世愛憐少子彌留而尙冀興宗撫  
字有人姑息而難期肖父縱相依而共命終屬伶俜同  
此意而未言豈求原諒於是卻華飾而皦然守素帷而  
不嫁月織一絹日儲十錢與麴昭易書爲孟宗作破蕭



條薑篋颺閃糠鐙代婢晨炊課兒夜讀機聲互答暑齟  
敢眠屐響永停宗姻罕覲至然松節能虛寡女之絲久  
茹菜菹仍潔先生之饌求非雀炙戰十指以難供和到  
熊丸痛兩心之俱苦已我春山上舍礪甫茂才神檢不  
凡先基益懋翱翔膠序俯仰吟壇文章夙許二難少壯  
敢兼三好敦槃望重縞紵歡聯機雲之解東西求點之  
山大小譽不聞乎腰鼓集擬撰乎聯珠兩太孺人顧之  
而後喜可知已且也生原向外而各思予父之烝嘗莫  
竟誰尸而永憶先人之嗜好錙銖所積而念塵寒單絲  
粟靡贏而恩隆賑贍燔券之義倡自房敖指困之風勉

於光獨凡斯絕行具有同心宜其譽播輶軒 恩承綽  
楔章逢蟬冕文字詩歌以表淑德芳儀以介曼齡緋福  
朱竹垞靜志居詩話云明張黃門甯有二妾曰寒香晚  
翠黃門歿後翦髮自誓不下樓者四十年有司以聞詔  
旌爲雙節事原一例功實迥殊嘆成立之孔艱卜顯揚  
之靡艾古今無偶史冊當書又况交到忘年分宜拜母  
者乎古者嘉禮例致祝辭敢援斯義以爲兩太孺人晉  
一觴曰

守節實易撫孤良難藉左提而右挈嗟影隻而形單死  
生無愧心力俱殫松比葉以閱時竹交枝而耐寒慶棣

萼之離離普餘蔭於庭蘭又曰

列女傳中竟無其匹傳豈母心載原史筆知何代與何  
年更何人而紀寶極花甲之重周麗萱堂之愛日

樂志堂文集卷十五

樂志堂文集卷十六

南海 譚 瑩玉生撰

新建粵秀山學海堂上梁文

范甯臺高本乏江山之助謝安墅僻唯供絲竹之娛信  
二美其難兼豈三餘之勿憩徐湛之風亭月觀文士偕  
游竟陵王華宇精廬生徒可給有懷塾側無用栖憑凡  
厥庠脩此焉津寄阮制府陶鈞士類襟冕人倫將培植  
也之基欲暢遊焉之趣酌舊章而營繕范水模山課高  
弟以精勤墨莊書庫爰因阿而結牖亦依澗以開櫺窮  
經治事胡瑗昔以名齋望邑拒山劉瓛因而立館三城

烟月全收几榻之間萬里雲山小築林巒之表桐楊夾  
植蘭菊叢生魚鳥相親雲霞競遠經書笙磬略邀槐市  
之歡茨宇桑麻遠勝檀橋之舊才端性緒寄懷于海闊  
天空玉色金聲振采於花承木映林邊炙研不須顏斐  
之薪松外著書亦有楊孚之雪南宮北寺別做規模迴  
榭華樓遙深寄託麾幢市道伫看旌節之花巾卷充庭  
豈獨科名之草今者徐興百堵試頓雙枝停爾斧斤聽  
余謠頌喜名區之乍闢十年樹木百年樹人賀橫舍之  
落成剛日讀經柔日讀史

約同修六省戰船牒諸神疏

代德會廉訪作

夫大治戰艦繫君國之安危原愧邊材仗賓僚之翊贊  
聰明正直當知善惡之分邪曲奸回合致死亡之慘具  
官某渥承 綸綍督辦朦朧三軍之生死攸關六省之  
存亡所寄原難獨任方賴兼營宜瀝膽以披肝已推心  
而置腹獨是爲帑甚鉅爲日綦長或乘便以營私實忘  
恩而負義身家之事不敢以上瀆明威朋友之交不僅  
以微詞決絕苟存私慝例伏冥誅各奉聲靈理宜昭鑒  
率土普天之同憤夫豈偶然小人君子之易淆何妨共  
白謹疏

募修城西文昌廟疏

代

粵自六宗禋於虞帝四類兆於周官靈均所歌太史曾  
記司命祀典從古隆焉後儒檢窮神之祕苑徵北夢之  
瑣言太平廣記彙其詳宛委餘編考其異以洎周洪謨  
之所糾朱彝尊之所譏遂謂今神非沿舊典不知星精  
偶謫史傳多稱第防越譏楚女之誣直疑嶽降崧生之  
誕矧以科目顯靈

絲綸煥采春秋以時而祭永同漢壽亭侯神明所宅之  
區獨說梓潼山水增其式廓實深香火之緣假我文章  
彌盛衣冠之氣我城西文昌廟創建於明代屢修於我



朝隔壁神弦南海之梅檀一例千秋廟貌西園之翰  
墨彌香顧自嘉慶丙辰以迄道光乙未昔日雲霞照灼  
金碧熒煌邇年風雨飄蕭丹青剝落鼠穿櫺而或墮蟻  
穴柱而誰防月逕窺龕塵都凝榭且也門以內室仍太  
狹難容雲馬騶車廟之旁牆半不齊更雜兔葵燕麥規  
模宜改經費益繁年經四十載豪家之瑣第何如需約  
五千金吾輩之空囊誰辦而或更謂頻年旱潦屢事蠲  
輸方解衣推食仍恐不遑卽崇德報功殆宜稍緩又豈  
知神原孝友宿象忠良唯四民當儉歲而無他卽闔境  
沐鴻庥於靡旣由來風俗敬事神祇麾幢導真武之輿

簫鼓賽金華之廟以至禳火星於九月木映花承作佛  
事於中元金迷昏醉莫不蠲羸斥羨腐至鳧趨豈有科  
名鄭重寶司果報於人間不教供奉莊嚴永迓精靈於  
天上唯冀當代才人各坊善士樂襄美舉競欣餘貲卽  
見地湧樓臺天開閭闔丹楹刻桷伏檻飛軒等月府以  
同脩酌星泉而特薦預作掄元之賦盍徵厓下放言總  
沿集福之名試核陔餘叢考功德過仙山佛屋崇隆亦  
壁沼環林善縱有心終勝貪慳之未破言非無據請看  
福慧之難兼况無所爲而爲甯莫之致而至蟬聯科第  
或幾同廟食之縣延鳳翥聲華仍永藉文星之照耀

募重建官窰新基祖廟疏

代

昔隄決東郡會聞白馬之祈祠置方渠亦視青蛇之迹  
五石犀並作仍將厭水之精兩黃鵠誰云奚俟託神相  
告別有沂流木像神比唐村居然冥霧黑旗市無道院  
可乎我官窰新基祖廟建由洪武脩迄康熙獨大欖堡  
咸馨其威靈卽烏茶埭亦資其保障海環象嶺廟控廬  
包遠護萬石之村邇鄰三江之署仍若脩真太嶽山曰  
武當幾如錫福分江祠標靈應舊榜曰經正社學左有  
祠祀金花夫人右爲青龍園後有樓祀文武二帝朔望  
讀法旬月校文武帳文弦耕琴耨瑟社學所由名矣慨

自十四年之積潦頻經六千丈之長圍中決連雨淋浪  
平兩郡游波溢溢乎三城七十餘家之地並齧深潭三  
百一頃之田難憑軟堰觀岐本無攢石洊至沸騰鍾離  
豈在下流業因摧壞允宜薦蔬雜蒔禾稼實傷竟使帶  
藻衣苔蘋蘩久缺幸值我制府敏肅廬公今大司寇中  
丞祁公方伯吉公刺史余公分別是非推知停折師度  
則心能穿地王尊則足竟齊波培薄增卑疏盈瀉溢大  
防三而迭作匪以禁錢受潮雨而不虞誰命鐵弩王延  
世治隄使者術受楊焉謝安石築埭新城恩同召伯夫  
捍患禦灾神之職也崇德報功民之願也不聞飯豆羹

芋竟復鴻郤之陂實使分風擘流任圯宮亭之廟居是  
鄉者愬然已今值巡簡朱公分閩羅公同襄平惠之政  
竊崇廢墜之脩首發殷情屬飲盛舉宜仍舊貫以答神  
庥且樹荆棘襍柏楊仲父之令也舉長菱沈美玉武帝  
之歌也稍拓前規特培尾段此亦塢流之法不勞護岸  
之方足使補獎完堅防遏衝要海作橋而不傾宛然豎  
柱灘留廟而特驗勿泥裹篙已猶多隙地更闢叢祠江  
防實利賴於此邦廟貌並式瞻乎各憲俎豆尸祝夫何  
閒然所冀一方士女閩省官民無忘司水之原同切布  
金之想太和宮殿元武冠裳魚稻並饒馮螭不警功原

集卷二十一  
無量事必有因莊嚴如鳳閣龍樓膜拜逮魚姑蜺妹豈  
爲紙錢入市宜鎮北門宛然銅鼓鏗庭特尊南海獨渠  
有千金之號舉均出平衆肇已戶徵萬福之來塞原期  
平神許謹疏

重建官窰鳳山白衣大士古廟募疏

代

夫佛門尊宿特標菩薩之稱經藏真詮妙契慈悲之旨  
是蓋除煩惱易得喜歡多所以高王祕籍靡閒華戎大  
士精廬普營中外灑人間之雨露楊柳枝枝擁天上之  
雲霞芙蕖的的走帆檣於萬里巖謁普陀聞鐘磬於三  
城山朝粵秀又况妙高臺畔宛坡老之重來金肅門邊  
本達摩之初地堂依寶月蘆蔔花濃浦認沈香娑羅樹  
古彌盛衣冠之氣久論香火之緣地亦號以金山誰留  
玉帶城舊開乎紺宇神示白衣者乎若我官窰鳳山白  
衣觀音古廟前憑象嶺後倚麟山左跨鰲洲右鄰鷺苑

石門尋陋愛瓶鉢之蕭閒獅海珠江覺樓臺之湧現惟  
神由聞而覺有色皆空普度衆生遍巡率土後賢讀王  
世貞之本紀胡應麟之筆叢厯引法苑珠林太平廣記  
以迄甄龍友之所讚趙雲松之所徵誰測面目之本來  
彌見神通之廣大又何必證石麟之誕降泥玉燕之禎  
祥而不知大德曰生端由積慶志心皈命各有來因何  
卽鞠育之殷勤易顯當前之指點矧以耕推漁讓具見  
鄉風子孝孫賢各縣宗祀門同韓穆村是朱陳星晚露  
初講藍田之約法鷗邊續外論白社之機緣同被神庥  
宜虔廟祭顧自康熙五十六年丁酉以逮嘉慶七年壬



戊始建再修兼年累載日月往復風霜凋零七寶幢欹  
九華磬裂閒僧飛錫知去住於何方古佛傳燈嘆精靈  
之未泯爰難卜以畚土業鳩工而庀材非彈指而可成  
難仔肩而獨任伏願十方善信闔省官民捐寶貴以抒  
誠俾莊嚴而護法本無分於畛域豈有損於邱山仁見  
實地棲禪金河證果共喜如來度世同譜神弦何須彌  
勒同龕重開淨域不僅金華廟裏靈著西湖第如黃木  
灣前秩崇南海年年報賽宛然禾穀夫人各各依歸稍  
異目蓮尊者此日金錢佈施古碑例刻姓名他年繡褱  
嫵婉香界備書功德

重脩波羅江南海神廟募疏

竊以江河善下能推百谷之王水火兼司貴列三神以  
上望尊嶽瀆肅厯代之明禋地控華夷作一方之保障  
宜新廟貌用答神庥者已維波羅江南海神洪聖王廟  
者創建於隋世迭脩於我朝玉簡象鞭金旛銀盒鐵  
船巡海備驅使者六侯銅鼓鏗庭誓威靈兮百國兼連  
象郡直控虎門巍峩當黃木之灣翕赫認紅棉之樹息  
樓船之烽火蝙蝠爭飛靖海島之風濤鱉魚不至亭浴  
三更之日門環兩度之潮法物憲章韓碑蘇碣司空像  
設莊嚴平古井之波瀾估客帆檣誠敬醑靈祠之草木

獨受禪師之戒無害生靈業令奚醜之摧能扶宗社獨  
是丹青歲古輒臂年深漸就凋零頓形剝落依舊雜蔬  
薦荔幾如帶藻衣苔宜賡考室之詩載譜迎神之曲况  
值丙丁豐稔幾疑龜鑑渺茫誰令甲子周迴竟任驚帆  
來去蒲羸不事稻蟹無虞久議重脩同勦盛舉茲承憲  
諭並采鄉評共樂捐輸敢辭勞勩奠王封之俎豆敢霸  
國之干戈琛贐環趨樓臺湧現或者笙簫鼓吹同夢招  
邀森然兵馬車旗不聞移徙庶使僧道永司香火規模  
實古於西園衣冠肅拜冕旒靈爽遠通於南極不比橋  
成秦代仍煩豎柱之精靈依然碑勒漢時詳列出錢之

姓氏謹疏

秀水斗姥宮增建三元純陽諸殿募疏

代

夫巖櫳岫室斯稱簡寂之居桂闕松樞乃曰逍遙之谷  
懸壺賣藥偕長房而可游剖橘觀棋憶商山而宛在又  
况金堂乍闢玉洞方開非無流電之庭亦有明霞之宇  
然而少監歸山白水翠巖而互映武夷授館幔亭綵屋  
其何多欲崇元妙之家須廣神仙之宅我祖張鈔昇師  
國初羅浮山黃龍觀主也旣月咀日奠璧投金曾於  
福地肇建靈祠遙通玉笥之山近挹丹砂之井梯霞有  
訣同申祕祝於諸天縮地無方誰演元修於九域衲等  
羊城近地貝水幽棲特暢宗風方營小築傍鄰西浦舊

號南塘接靈源於酥醪契芳躅於烟雨雲中擊磬何須  
玉檻金樞霞外然香業有靈祠真館獨是方壺員嶠宮  
闕如雲碧水丹山樓臺似玉王知遠之所冀豈徒茂木  
清泉劉禹錫之方來已詠免葵燕麥幸此真庭尙羸隙  
地擬復建三元純陽諸殿焉梅梁架煙桂柱矗漢層檐  
飛而珠海霞丹伏檻構而花田月黑銀盤帆嶮靈通太  
上之家玉劍琤琤夢警邯鄲之道信列真之窟宅而名  
輩所流連者矣所愧喫石空勞點金誰信還錦帷而共  
覩掃樛帶而綦難實冀搢紳先生仁人君子捐贏斥羨  
顯德標功庶集腋而易成或仔肩而益美仁見霓旌羽

葆依稀明月前身敢言紺宇琳宮彷彿蓬萊左股土功  
幸完冰銜迭署衆妙無缺百祥有徵如同所願毋忘乞  
樹之靈且住爲佳敢作發棠之請謹疏

新建南海節孝祠募疏

代

竊聞龐母直繪于廳壁桓嫠特顯其門閭且欲加以讚  
銘賚之縑帛入林舒嘯詎願人知赴水留詩均宜廟祀  
吾邑節孝祠現在三元宮側九眼井旁屋僅數椽地無  
半畝秋霜春露誰曾爇以瓣香上雨旁風漸且鞠爲茂  
草幸值我史父臺特扇清芬普彰奇烈夫旌善表操長  
吏之權也搜潛采幽吾儒之責也業已彙呈清冊固當  
改建合祠仁看 綸綍恩隆歿存均感庶使梅檀供肅  
新舊同符原議于南海學宮西偏隙地特營傑構永播  
芳徽酌寒泉以薦馨馨貞石以傳後獨是亟宜斧木仍



待布金莊嚴同聖女仙姑功德過菴園塔寺影堂一例  
是所望于兒孫行路慨然原無分于彼此練裙縞悅共  
譜神弦月地雲堦實司陰教恍如劉氏之闕百詠流聞  
合仿漢朝之碑一錢臚列殿非漬血宛然來往精靈祠  
亦露筋更有頌颺篇什

募建梁陳屈張黃黎呂七先生合祠疏

代

夫抒懷古之情者務存不刊之烈廬褒賢之念者待闡  
彌光之緒是以祠標名德特祀九賢軒營抗風並享十  
哲瓣香尤在芳椒亟播焉嶺南詩藪 國初輩出藥亭  
獨漉翁山三先生洵堪鼎峙非同缶擊此外揚鑣類足  
繼軌遐邇所推尤在數子越百年而葯房芋洲二樵石  
帆四先生起寶稱雅才無愧作者一時雲龍匪猶風馬  
而懷鉛握槧前超後絕亦足以比物荃蓀連類鸞龍者  
矣僕等懷舊思古實深永嘆竊欲挹彼梅檀奠以蘭茝  
若夫義存祀典可略言焉藥亭獨漉葯房芋洲訪厥宅

址並在城隅雖叢臺或傾而口碑未泯其他諸子或租  
船詠史或詣肆觀書類恒連襪倚裳推襟送抱則登詩  
隱之樓者豈獨伫想黃鏞過大雅之堂者不僅興懷郭  
棐虞翻園圯因訶林以奠基楊孚宅淪傍松山而啟宇  
此其宜祀者一也藥亭二樵石帆久致忽諸之嘆夙負  
餒而之痛野祭或鄰乎新鬼家集亦委之故人嗟天道  
之難問繫生人所同悼他或楹書善讀庭誥永貽飈車  
雲馬精靈之來去依然春蘭秋菊涕淚之飄零誰晤遠  
仿林逋處士之例近徵厲鶚徵君之典允宜割青山爲  
太白之莊鑄黃金作閬仙之像此其宜祀者又一也嶺

南畫學前明未振林良呂紀張穆之之輩非不力參造化神凝阿堵而習者蓋寡傳之亦鮮近乃戶視曹吳家師顧陸實提倡之有自豈推遷之靡定三家旣迭有流聞四子亦各臻佳妙二樵挺出尤推巨手窮幽探絕天造神設誰工謳者不師王豹卽例茶神宜參陸羽此其宜祀者又一也芙蓉淥側芝蘭湖畔左帶珠江前枕玉山可購隙地立崇祠以奠芳靈寄遐想相與提鵬挈鷺吟花獻竹菰蒲十里獨奏神弦香火一龕別開詩境或商榷乎文字或驅使乎丹青亦庶幾結閑緣於翰墨契深情於毫素者焉所冀撫跡懷人捐贏斥羨因阿結牖

接畛連局菱汀存渚風亭月觀寒泉一盞共薦青霞之  
祠廟鍊像巋然宛見曲紅之風度貞珉未勒短引先疏

擬復建西樵山白雲洞龍嵒閣等諸名勝募疏

代

夫以世懸千古猶表二鬢之稱爵匪三公特詔一鄉之  
立矧若武夷精舍成都草堂謂庾蘭成之所居風流未  
泯詣虞仲翔之故處淒咽不勝亦有堂堂廣文翁之石  
室更無父老言中散之竹林地主闕如山靈竊慟盍新  
鴻構俾迪前徽西樵山者前明吾粵諸鉅公偉儒講學  
地也挺嶠盤陟分霄刺天層阜巍然重嶺疊秀五百四  
峰之足抗三十二泉其迭環儘愜幽棲各宜小築紹江  
門之絕學嘉會樓開企典籍之高蹤抗風軒在曲江矩  
獲風度猶存新建生平異同敢辨巖層岫衍木映花承

明月送迎祥雲翬護隱囊紗帽散髻斜簪獲稻教歌采  
茶知禮陸慧曉與張融並宅鄭康成必應邵稱師信海  
內之不如際嶺南之極盛歲時遞嬗風雨飄蕭哀樂無  
端老成頓盡讀書堂圯長三逕之苔花載酒亭空踏四  
山之櫺葉爰逮我朝尤多好事因巖爲堵卽石成基  
人人語香火之緣各各極林泉之致先生離垢構園便  
欲終焉太僕思歸制宅端期不朽鷗邊犢外招文士以  
偕游星晚露初與古人而晤對風亭月觀花塢葑畦子  
季居秦望之山表聖隱王官之谷而白雲洞龍提閣等  
諸名勝尤稱絕境焉激湍互答晴嵐不飛嶠流相承洞

壑益遂續彩如墨紅堆躑躅之花浮響若鐘碧浸桃柳  
之葉宗少文登陟未遍宜作臥游王內史服食已脩何  
當樂死酈道元所謂余時逕此爲之踟躕爲之屢眷者  
非歟端明未老記看鄰火村春夢得重來賸見兔葵燕  
麥僧寮非故學舍不存夫綦難彷彿栖游者且說西河  
尙有典型寤嘆者當如北海鹿洞共尋遺址青山究屬  
誰家又况問總持之宅鼎族離居過丁卯之莊故基仍  
在允宜鳩工庀材遞復曩迹猿鶴知否漁樵願同水石  
自然室豈爲戴公而築酒肴不乏社或緣陶令而開有  
待布金方施畚鍤不徒斧木試覽圖經普告同人各襄



盛舉移居卜宅昔人懷此有年尅日入山吾輩諒非生  
客歸然瑞室煩作頌於方來仍仿古碑列出錢之姓氏

景泰寺募建客堂疏

代

景泰寺者白雲之福界也傾岑阻澗抗月棲霞香宇遙  
通慧樓相望弔學士傳經之院七仙之守護綦嚴問禪  
師卓錫之泉雙螭之浮沈靡得懷煙引霧偉仙人散髮  
之容帶阜纓轡話老衲誅茅之躅潮光山色處處留題  
瀑勢松聲年年寄賞洵勝流之屢眷而名輩所周翫者  
焉禪泉遞葺淨域新開界成金碧非無鴈沼鸚林閣敞  
栴檀亦有松門蘿幌獨是園安孤獨室署維摩量真十  
笏曷稱講義之林游絕三休敢說知名之寺羣鸞帶燕  
時並集乎香臺羽蓋雲車乃逕趨乎寶幄竊欲旁開講

序別構齋庭倚霞壁以安牕傍泉谿而列榭浮瓜折藕  
方足題詩衣綵塗金差堪布席菊黃蘭紫名僧敢藉以  
遣煩竹翠松蒼美日或因而適興寰中香水迭肆招提  
之游象外煙花別成清淨之所然而林泉待絢瓶鉢安  
施寄指上以誰彈湧毫端而詎現所冀十方善士一代  
偉人尋壑經邱捐贏斥羨模山范水全資畫景詩材顯  
德標功卽在珠林寶地鹿園掩麗鸞棋慙珍布之長者  
而羣驚見自達摩而亦嘆此日衲裙玉帶尋坡老之因  
緣他年禪榻鬢絲證樊川之閱歷普受僧家供養永貽  
之子子孫孫不徒佛地莊嚴誰道是空空色色

樂志堂文集卷十六